

邑侯畢公去思之碑

古稱邑宰爲民父母而膺其任者大率傳舍視之耳居其名求盡其實盡其實不愧其名如吾邑侯畢公者不其卓卓哉侯名昌緒字芸堂淄川人以癸酉明經分莅博野厯政多有聲及宰吾永也未下車則布衣芒屨潛訪墟落間以故邑之風俗得失閭閻利病無不洞悉於中旣莅任乃爲之鋤強梗翼善良勸耕織減差徭民有不便者悉除之侯廉且明事無大小剖決如神吏民不敢欺其不率教者扑之曰吾爾父母爾怕淫誕逸吾不忍爾縱也聞者爲之感泣行之其年政平訟理士庶翕然歡忭來暮之歌溢乎匝境而侯猶環顧咨嗟戚戚然若有隱憂者永邑地最瘠且形勢卑下桑乾環其東北歲數漲發爲患甚鉅今年夏五月突決南岸當其衝者井湮木刊邑之南境幾無完室侯巡查安撫不車不蓋於炎

風酷日中徒跣跋涉日恒數十里或竟日不得食食卽乞粗糲抔
濁潦共咽之從者且不堪而侯獨倉皇奔赴心益感氣益壯因歔
歔流涕曰吾爾父母而使爾昏墊流離若此吾能坐視乎橐中素
不豐亟搜括衣物納質庫中得錢數百緡悉分贍之所全活者無
算而侯之孜孜爲民計者未已也遂爲之請賑初不許侯力持之
不少挫再駁再詳卒得請災黎更生安堵如故比戶恬然初未有
流亡失業者於是耆老相屬而慶曰吾儕自百年以來生聚於此
今幾不復相保而卒得有其室家伊誰之力矧吾之子子孫孫出
入耕鑿於茲土宴然享樂利於無涯者又誰之賜耶古所稱民之
父母其侯之謂乎其侯之謂乎因請於侯爲伐石紀之且綴以頌
言俾方來者蹈詠於無窮焉其辭曰

蚩蚩我氓作息日休孰易爾田孰勤爾耰我公戾止俾民不偷孰

褚衣冠孰伍田疇我侯戾止俾民無尤食無鑿精車無華輶載飢
載渴求民所求伊戚伊阻憂民所憂河伯肆虐泛濫橫流塏爽爲
谷卑濕成湫腹疾泣魚項槁立鳩侯不憚勞拮据綢繆爲民請命
振粟汎舟若旱而雨若病而瘳負暄以嘻含哺以游旌蓋翩翩遵
路鳴騶攀轅遮道黃童白叟侯兮去我誰爲我謀生我福我沒世
難酬太行蒼蒼濕水悠悠並侯之德淳峙千秋

右道光二十五年正月邑進士劉伯壘撰

一

重修護城隄碑記

戊辰夏余自春明權篆益昌甫下車覓護城隄一帶環匝數里勢漸傾圯余意欲重修以爲斯邑利詢之父老告余曰此前明嘉靖四十二年邑侯馮公鑑所建

順治十四年康熙十五年二次補葺之至道光二十二年畢公昌緒蒞斯邑復踵而修之迄今數十載無所用余曰否否古者隄防之設所以備水潦祇可修而無用不可用而未修況斯城踞永定河下游一經潰決勢不可支古人所爲防患於未萌其用心誠深且遠也洎自閏四月二十一日河田固安潰口水漲直趨隄所巨浪拍天洪波動地人心張皇號呼載道余卽督工隄上與城廂紳民晝夜巡查風雨奔馳越數月水漸平城內外獲安堵無恙始知盡其心於數十年之前收其效於數十年之後微畢公之力不及

此爰與邑中紳士賈如城孟昭盛劉玉桂等再四圖維更加修理捐資助興版築一切工程費用余與諸公親率辦理俱不假手於人從公之士亦諒余因保衛地方起見咸踴躍効命周三零三弓戶弓於己巳二月朔興工重修二旬之間卽告厥成根柢堅固規模崇峻隄外之河因起土而疏濬之亦復閎深就理邑皆歸功於余余曰紳董之力也閭閻之福也余何力之有焉所慮者沙積則易虧不培其基何以固水浸則易潰不破其浪何以平用是栽柳成行沿隄保護庶經久而不壞隨堤種柳其卽此意也夫但願自今以往芳林庇廕水波不興而後之蒞斯任者與邑諸紳共襄是舉時修葺而光大之俾庶姓免其魚之患斯邑幸甚余亦樂甚

右同治九年三月永清縣知縣李秉鈞撰

創建益昌書院記

驚湖鹿洞宋儒講學之區也其始一二人倡之而天下之士淬濯磨礪志孔孟志心孔孟心由南宋以來七百有餘歲名賢輩出如日月焉亘古常新何其道之移人速而入人深也人心莫不有不言而同然者亦在迎其機而導之耳豈有異術歟永雖蕞爾邑邇首善之地際聖主右文之時沐浴教化二百二十有餘年矣而士也曾無環堵畝官爲朝夕藏修游息之所吁可怪也銘勲捧檄移權茲邑數月以來清理積獄不敢一日卽於安因思風俗之美成於教化而端教化者惟士爲四民先欲有以鼓舞而作興之猶慮邑人士狃夙習而莫吾信也乃與韓季二廣文集諸生於明倫堂而告之曰永邑地濱大河遷徙靡常淤復荒地有徙飽豪右吏胥豪耳徵其歲入以嘉惠我士林所謂惠而不費者非歟諸生

僉曰善於是子率戶田二科吏執繩丈走阡陌勘出荒地二十餘頃諸紳富亦踴躍樂輸捐寫二千餘金以半購民宅新其衡宇懸以扁額顏曰益昌煥然大觀矣餘則發商生息修膳膏火於是出焉計自去冬以迄今茲凡七閱月聿觀厥成始信前此廢而不講乃迎機而導之者之未有其人人心不言而同然者固未盡泯滅已然則推此興事率作之心於是而親師取友於是而經明行修處爲善士出爲名臣以古方今何敢多讓干事取祿云乎哉是舉也前任李君 衡如已有此意未及舉行而去廣文韓君 貞一永清汎張君 子班誘掖獎勸始終任其勤君子成人之美尤爲不可及雖然莫爲之前雖美弗彰莫爲之後雖盛弗傳來者鑒吾心循而修之恢而廣之庶斯舉之不朽也是爲記

右同治九年五月永清縣知縣邱銘勲撰

益昌書院碑記

益昌書院建於東野邱公擴於漢陽李公而實成於今 制府合
漑相公邱公以名進士宰武清歲己巳調署是邑黜浮華崇實學
以邑無書院日圖所以創建之遂躬清地畝酌撥差徭勸諭紳富
出貲購院落以餘貲發商生息作修脯規制甫定而奉調去繼之
者爲前宰李公公固豪士知所樹立未卽舉行而與邱公相對調
至是益善邱公之所爲於書院南建義學數楹立初基端蒙養而
學井井然有序矣因前所清地重爲水淹復勘出無糧地數頃歸
書院猶慮入不敷出久而將廢也請於 制府以賑餘生息撥作
膏火資 制府嘉其意如所請而書院遂可久云且夫家有塾黨
有庠古之道也我

朝典學右文超越往古

聖祖仁皇帝詔天下府州縣澤宮之外廣立書院蓋多方以誘掖之也多方誘掖而無非學焉則所以培養人材者至深厚也益昌密邇京師涵濡

聖化者二百有餘年矣居斯民之上而操風化之原者亦百餘人矣而書院之成必遲之又久以至於今脫非邱公孰爲之前非李公孰爲之後有二公之後先濟美而非今制府之嘉惠士林又何以觀厥成乎後之官斯土者遵而守之恢而廣之鼓舞而興起之當有月異歲不同者而士之藏修息游於其中宜何如敬業樂羣不自菲薄答

聖朝雅化之隆與數公培植之厚余不敏未能增美前徽惟是奉行弗怠無使墮廢焉斯已矣若夫刻劃金石壽之貞珉言雖無文余之責也爰簪筆而爲之記

右光緒元年四月永清縣知縣吳欽撰

天
平
集
示

義學碑記

書院之南有屋數楹顏曰義學前宰漢陽李公所創建也夫君子之教有本有末書院爲樂育英才之地操風化之原者皆知興作焉若夫小學灋掃應對進退則以爲末焉而忽之以爲末焉而忽之而已失其本矣李公於邑置義學三而本城爲最先捐廉購民地築學舍勘得無糧地四頃餘畝作脩脯紙筆費其時爲同治辛未歲倡捐者儒學韓君少尉陳君司事則監生孟昭盛劉玉桂文生劉孟培賈如城也越四年余蒞茲土每赴書院課士聞誦讀聲琅琅出金石咸曰此李公之遺澤也若公者可謂知本矣爰爲記而刻其學規地畝於碑陰

右光緒元年四月永清縣知縣吳欽撰

韓村義學記

韓村義學不知創於何時舊志載有房屋一所地二十畝康熙二十七年邑宰祖君夏屏清出舊址並勸令鄉眾買地二十五畝合前其地四十五畝迨乾隆二十七年村人劉運昌捐入糧地二十一畝房舍一區卽今學基是也後以經理乏人房屋傾頽地畝隱匿義學之廢已數十年詢諸里老皆無可徵僅於邑乘中得梗概焉予與同城諸公暨眾紳等於本城創立義學已經落成延師教讀而韓村四達之區舊有義學置之不問是未有者尙欲振興已有者聽其墮廢非所以重文教也用是根究原地並鄉約隱種之地四十三畝又查出父口村魏學源無糧地十五畝七分統歸義學合前地共一頃二十五畝六分又房基一段計歲入可得地租永錢四百二十三千聊敷束脩之用而學舍傾圯授讀無所乃勸

諭紳士商民共襄義舉不數月間堂構聿新矣過廬聞誦讀聲者
咸推善於予予曰始則前宰之功今則紳民之力予何有焉所慮
行久廢弛徒勞罔功後之君子葺而脩之恢而廣之不致如前此
之廢墜也則幸甚矣是爲記

右同治十三年七月永清縣知縣李秉鈞撰

曹家務義學記

邑之北有村曰曹家務濱渾河漢回雜居良莠不齊前志所稱盜藪者也比年盜風稍息而樸野成俗未知誦詩讀書變化氣質誰守此土不思化頑梗爲善夏余固自慙焉而有志未逮也今秋查勘書院義學養濟院地畝至其村傳集村民教以孝弟力田勗勉子弟民人馬昌太前請曰嵒聞城中創書院矣鄉村亦許立義學乎余曰鄉有塾無有序自古皆然何爲而不可顧安所得經費耶對曰村中舊有無糧香火地三頃餘爲村人崔邦慶隱種復有村衆新墾地四頃餘畝升科議租作香火資延師課讀俾幼稚稍知詩書民之幸也余聞而喜曰美哉此固吾熟籌之而有志未逮者也人之欲善誰不如我習俗其移人乎隨准所請捐廉爲之倡築學舍三月而落成今而後鄙俚之鄉亦聞誦讀之聲從此移風